

**REPOBLIKAN'I MADAGASIKARA**

Fitiavana – Tanindrazana – Fandrosoana

**Akademia malagasy**

Sokajy Haikanto sy Hailaza

**Ny Taniko, ny Tantarako, ny Teniko :  
adidiko sy andraikitra ny fahafantarana  
sy fampahafantarana azy**

**Mby aiza ny Fanavaozana ny Fisainana sy ny Fifanabeazana.**

**Fanasana handray anjara amina Loabariandasy**

**Andro iraisam-pirenena ho an'ny Teny Ibeazana**

**21 Febroary 2014**

<b>Lalantsaina .....</b>	<b>2</b>
<b>Andinindininy momba ny hetsika .....</b>	<b>3</b>
<b>Fandaharam-potoana sy fifandaminana mandritra ny loabariandasy .....</b>	<b>4</b>
<b>Angona voambolana momba ny fanabeazana sy fifanabeazana ...</b>	<b>5</b>

### **Ifandraisana**

**Sokajy Haikanto – Hailaza**

**sy ny**

**Foibe momba ny Teny an’ny Akademia Malagasy**

45 - 47, Araben’ny 26 Jona 1960

Tahala Rarihasina Analakely

☎ : +261 20 22 559 97

+ 261 34 01 732 70

✉ : [tenymalagasy@gmail.com](mailto:tenymalagasy@gmail.com)

**Antony** : Fanasana handray anjara amina loabariandasy sy fanaingana fiaraha-miasa

Tompoko,

**Ny Akademia Malagasy** dia manokana ny 21 Febroary 2014, Andro iraisam-pirenena momba ny Teny ibeazana, ho fotoana hoentina manokatra sehatra iray momba ny fanavaozana ny fisainana sy ny fifanabeazana.

**Ho fanokafana izany sehatra momba ny fanavaozana ny fisainana sy ny fifanabeazana izany**, dia hisy *loabariandasy* hokarakarainy amin'io 21 Febroary 2014 io. Ny lohahevitra hovoizina amin'izany dia ny hoe :

**«Ny Taniko, ny Tantarako, ny Teniko :**

***adidiko sy andraikitro ny fahafantarana sy fampahafantarana azy* ».**

Antenaina fa io loabariandasy io dia hahafahana mandalina bebe kokoa ny amin'ny fomba handresena lahatra fa ny fahafantarana ny Tany, ny Tantara, ny Teny dia antoky ny fandrosoan'ny firenena.

**Mino izahay fa manao ho zava-dehibe ny fampandrosoana ny firenena ianao**, no sady anisan'ny olona afaka mivoy fijery vaovao mahasoana ny fiarahamonina. Koa tsy misalasala izahay manasa anao handray anjara amin'ny loabariandasy izay hotanterahina ny

**Zoma 21 Febroary 2014**

**Lapan'ny Akademia Malagasy eny Tsimbazaza**

**amin'ny 9 ora maraina hatamin'ny 12 ora sy sasany atoandro.**

Hantenainay koa fa hizara ny traikefa efa anananao ianao amin'izany ary hirotsaka feno amin'ny fandavorariana izany fotoana izany.

Mirary soa indrindra.

Ny Filohan'ny Sokajy Haikanto sy Hailaza  
Ratsimandrava Juliette

# Lalantsaina

**Ny Taniko, ny Tantarako, ny Teniko :**

**adidiko sy andraikitro ny fahafantarana sy fampahafantarana azy**

*Mby aiza ny Fanavaozana ny Fisainana sy ny Fifanabeazana.*

**M**iaina ao anaty vanimpotoana sarotra sy mihasarotra hatrany isika, no hihasarotra, raha tsy hampitomboina ny fiheverana ny momba ny « fifanabeazana sy ny fandrantoana fahalalana », na eo amin'ny ankizy, na eo amin'ny tanora, na eo amin'ny olon-dehibe, na eo amina sehatra inona na eo amin'ny sehatra inona. Efa samy manao izay ho afany avy ny sokajin'asa maro samihafa, ary maro rahateo ny traikefa efa tokony havoitra. **Inoana fa mbola misy zavatsoa eto Madagasikara, raha raisina ny hevitra nodinihina tamin'ny 21 Febroary 2013.** Koa **Fifanabeazana toa inona ary no andrandraina ankehitriny ?**

**M**irimorimo ka mihamahazo vahana izay tsy izy ny haitahaka. Ahiana hisy fiantraikany ratsy eo amin'ny haizavatra, ny hairaha, ny haifamoronana zava-mahasoa isan-karazany izany.

**Manoloana izany, inona anefa no azo araroatina ho an'ny fifanabeazana?**

**V**okatry ny fifaneraserana amina olona maro, izay manan-kolazaina amin'io lafiny fifanabeazana io sy efa manana voka-pikarohana na voka-pandinihana momba izany kanefa tsy ampy ny sehatra ivelany, dia hosokafana ny lalana hitondran'ny olona ny fiheverany sy ny hifanakalozan-kevitra amin'ny tambazotra, ny haino aman-jery, ny habaka internet... Hiompana amina lafin-javatra maro izany hahafahana mifanabe ka mety hanokatra sy hamatsy ny vavahadin-tsaina eo amin'ny ray aman-dreny (miha-tanora tokoa ankehitriny), eo amin'ny mpanabe sy ny orindraraha misahana fanabeazana, eo amin'ny zoky sy zandry ary raiamandreny eo amin'ny fiarahamonina, eny ambanivohitra sy ety an-tanandehibe, no afaka hitondra fanavaozana eo amin'ny fisainany ny fifanabeazana.

**Ny** tolokevitra voaray mandritra ny loabariandasy dia heverina ho fiandohana fifanakalozan-kevitra hitarina any amin'ny Faritra samihafa, izay hampivoitra ny mahaizy azy sy ny vahaolana manakaiky azy. Andrandraina ny fijoroana **tambazotra** mamondrona ny orindraraha sy ny mpandraraha, ny mpampiserasera mpivoy fahalalana sy torohay amin'ny Teny Malagasy ary ireo manana fahaizana manokana momba ny serasera ; ny andraikitra apetraka amin'izy ireo dia ny fanentanana ny rehetra na hatraiza na hatraiza, ary araroatina ny fahafehezana ankehitriny ny teknolojian'ny fifandraisan-davitra. Ny tanjona izany dia ny mba **hivoy fijery vaovao sy mahasoana ny fiarahamonina** izy ireo, izay efa katsahina rahateo eto amin'ny Akademia malagasy.

# Andinindininy momba ny hetsika

## Hetsika

Loabariandasy

21 Febroary 2014 – 9ora maraina hatramin’ny 12 ora sy sasany

eto amin’ny Akademia Malagasy, Tsimbazaza

## Lohahevitra hovoizina

« Ny Taniko, ny Tantarako, ny Teniko : adidiko sy andraikitra ny fahafantarana sy fampahafantarana azy » : Fomba ahoana no handresena lahatra fa ny fahafantarana ny Tany, ny Tantara, ny Teny dia antoky ny fandrosoan’i Madagasikara ?

## Tanjona ankapobeny

Fahafantarana sy fampahafantarana « ny Taniko, ny Tantarako, ny Teniko » ho antoky ny fandrosoan’i Madagasikara

## Tanjona manokana

- Fivoizana fijery vaovao sy mahasoana ho an’ny fiarahamonina hoentina mifanabe
- Fampivoarana ny tontolon’ny « fifanabeazana » amin’ny alalan’ny hevitra mitondra fandrosoana ho an’ny firenena sady azo voizina eo amin’ny fiarahamonina fa tsy ho hevitra savoandanitra fotsiny
- Fampijoroana tambazotra mamondrona ny orindraraha sy ny mpandraraaha ary ny mpampiserasera mpivoy fahalala sy torohay amin’ny Teny malagasy
- Fanaingana ny mpandray anjara hirotsaka an-tsehatra hiara-kiasa handalina sy hanaparitaka ny hevitra voaangona ary handresy lahatra ny mpiandraikitra isan-tsehatra amin’ny fanavaozana ny fisainana sy ny fifanabeazana

## Mpandray anjara

- Mpikaroka, mpandinika ary izay rehetra mahatsiaro ho manana tolokevitra hampivoatra ny tontolon’ny fifanabeazana (hevitra mampandroso ny firenena)
- Andiana mpampiserasera manana fahaizana manokana eo amin’ny fanaovana famintinana sy famoahana amin’ny fomba mety sy mazava ny hevitra ny hafa
- Andiana mpampiserasera mahafehy ny fanomezana endrika ny hevitra fintina

## Serasera ampiasaina

- Fampiasana ny teknôlôjia manaraka ny toetrandro ankehitriny
- Fanaparahana fanasana sy Fiaraha-miasa amin’ny haino aman-jery

## Fandaharam-potoana

**09 ora – 09 ora 15** : Kabary fiarahabana

**9 ora 15 – 9 ora 45** : Velakevitra fanokafana

**9 ora 45 – 10 ora** : Fitsinjarana ho vaomiera

**10 ora – 11 ora sy 30** :

Loabariandasy am-boamiera hamaliana fanontaniana vitsivitsy

- Ahoana no ilazana fa ny fahalalana momba ny taniko, ny tantarako ary ny teniko dia mampandroso?
- Inona no tokony hatao hahalalana tsara ny taniko, ny tantarako ary ny teniko?
- Inona no mampirehareha ny Malagasy ka hamelona indray ny hambom-pony ?
- Ahoana no hamaritana ny ho tohin'ny asa?

**11 ora 30 – 12 ora 30** : Fanangonana ny soso-kevitra